

Bu yıl gagauzlara karşı yapılan Açlık genoğidın bitmesinin 75-ci yılı.

Gagauziya Başkanı seçimneri günü belli

Bakmadaan ona, ani Gagauziyanın büünkü Başkankası pek istämeer, Gagauziya Halk Topluşu aldı karar, ani sıradaki Gagauziya Başkanı seçimneri yapılsın 2023 yılın Çiçek ayın (aprel) 30-da.

Gagauziya Halk Topluşu kendisinin 16.08.2022 günü toplantısında, ansızdan, 20 halk deputatın kayıllınan, karar aladı Gagauziya Başkanı seçimneri 2023 yılın Çiçek ayın (aprel) 30-da yapmaa. Buna karşı kalktı Gagauziya İspolkomun Predsedatelin ikinci yardımcısı Olesä TANASOG-LU, urgulayıp, ani bu büyük yannışlık, çünkü, maamilä surat, Başkankanın zamanı 2023-cü yılın Orak ayın (iyül) 19-da bitärmış.

A. STOYANOGLUnun payvantlarını biraz bollattılar

Harman ayın (avgust) 25-dä Kişinev Apelätiya Palatası karar aldı gagauz olan hem bir kabaatsız işindän alınan Moldovanın Baş prokurorun Aleksandr STOYANOGLUnun payvantlarını biraz bollatmaa.



Bu karara görä Aleksandr STOYANOGLUya pasportu geeri çevirildi hem kolaylık verildi gazetacılar hem başka prokurorlarla buluşmaa hem da toplantılara katılmaa. Bundan kaarä Aleksandr STOYANOGLU raat var nicä Moldovadan çıkıp girsin.

Nicä açıkladı kendisi Aleksandr STOYANOGLU, o hep taa sud kontrolü altında kalêr da, çağırıldıynan, lăazım prokuraturaya ya da suda gelsin.

Moldovanın gagauz olan Baş prokuroru Aleksandr STOYANOGLU Moldovanın informațiya Slujbasının SİSı (eski KGB) tarafından, bir kabaatsız, 2021-ci yılın Canavar ayın (oktârbi) 5-dä avşamneyin saat 18:00 için açıklanmış pres-konferențiyanın önündä tutuklandı.

Bunun esabını da yok kim sorsun: Bütündünnä Gagauzların Kongreslerini yok edip, ekonomika forumnarı yapêrlar



Gagauziya Başkankasının altında olan Gagauziya İspolkomu açıkladı, ani sıradaki “Invest Gagauzia” ekonomika forumu bu yıl Canavar ayın (oktâbri) 7-8 günnerindä olaceymış. Ye kaçırılan hem atladlan Bütündünnä gagauzların artık V-si, VI-sı hem VII-si Kongresleri ne zaman olacek?

3-cü sayfa

“Fulger” speñnaz poliñtiyası Komratta: parmak sallamak mı, korkutmak mı, Gagauziyayı enmək mi?

Harman ayın (avgust) 18-dä, taman Gagauz Respublikasının gününä karşı, komratlılar, uyandıynan, şaşarak gördülär Gagauziyanın başkasabasının merkezindä Moldovanın “Fulger” speñnaz poliñtiya Birliin maşinalarını hem poliñtiyacılarını, ani bronejeletlarla hem avtomatlarlandılar. Açıklanan haberlerä görä, “Fulger” Komratta bir denemäylenmiş. Denemenin sebebi dâ – “Komrat Universitetin bir korpusunu teroristlärlä almış da speñnaz lăazım kurtarsın studentları hem prepodavatelleri”.

Şaşıllacak iş o ani, bu maamilä surat denemeklärlä için Gagauziyaya hiç birisi bir haber vermemiş. Bilersiniz, ani bitki vakıtlar Gagauziyada büünkü rejima karşı mitinglar geçer. O mitingların ana logunglardan birisi dâ – Büünkü kuvedi erä!

2-ci sayfa



“Fulger” speŭnaz poliŭtiyası Komratta: parmak sallamak mı, korkutmak mı, Gagauziyayı enmək mi?

Çeketmesi 1-ci sayfada.

Büük şüpâ var, ani Moldova Prezidenti Maya SANDUnun televizorda Gagauziya olan işlər için “biz destabilizatiya denemelerini esap alêriz” laflarından sora, gagauzlara parmak sallamak, korkutmak hem Gagauziyayı enmək için Moldovanın “Fulger” speŭnaz poliŭtiya Birlii Gagauziyada o günü bu kuvet gösterisini yaptı.

Moldova “Fulger” speŭnaz poliŭtiya Birlii kuruldu 1991-ci yılda, 400 kişiya yakın poliŭtiyası var. Moldovanın içindâ barışı hem raatlı korumakta en büük eri kaplêr.

Te ne bu sözdâ denemelâr için düşüner politikacılar:

İvan BURGUCU, Gagauz Respublikasının kurucularından birisi: “Moldova Respublikasının baamsız devleti statusunun diŭşmesi üzâ çıkarsa, da bununan ilgili olarak, Gagauziya öndercileri başlarsalar Gagauziyanın ertelenân statusu zakonuna realizaŭtiya yapmaa, ozaman Gagauziya öndercilerinin neytralizaŭtiyası nesoy yapılacak metodikası hem taktikası işlendi. Bu 100 proŭent!”

George KAVKALÜK, Moldova poliŭtiyasının Baş inspektoratın başının eski yardımcısı: “Komratta bu şou yapıldı diil onun için, ani terorizmaylan düüşmââ, ama onun için, ani bitki vakıtlar seslerini kaldıran insanınarı korkutmaa”.

28 yıl geeri satılan Gagauz Respublikasının 32-ci yılı bakıldı

2022-ci yılın Harman ayın (avgust) 19-da Komratta kutladılır bir yortu: 1990-cı yılın Harman ayın (avgust) 19-da Gagauz Halkın Üstolan Kongresindâ kurulan Gagauz Respublikasının hem 1994-cü yılda o Respublikanın başında bulunan eriflerin tarafından satılan o baamsız Gagauz Respublikasının 32-ci yıldönümünü.

Lââzım urgulamaa, ani gagauzlar baamsız Gagauz Respublikasını kurdular halklararası zakonnara görâ ozaman, açan Moldova Respublikasının kendi baamsızlığını kazanmasına hiç düşünmârdi dâ hem o baamsızlaa taa bir yıl vardı.

Ozaman, 1990-cı yılın Harman ayın (avgust) 19-da Gagauz Halkın Üstolan Kongresinâ ayrılan 450 deputat bir korkusuz bu baamsız Gagauz Respublikasını kurumaa karar aldılar da Gagauz Respublikasının kurulması-nı dünneyâ bildirildilər.

O Kongresinâ ayrılan deputatlar ilktân 1990-cı yılın Orak ayın (iyül) 22-dâ 411 oylan Gagauz Milli Gim-

nasını (laflar – Todur ZANET, muzıka – Mihail KOLSA), Gagauz Milli Bayraanı hem Gerbı kabletilâr, sora da Harman ayın (avgust) 19-da aldılar karar baamsız Gagauz Respublikayı kurmaa hem onun Prezidentini hem dâ Üüsek Sovetinin deputatlarını seçmââ deyni hazırlamakları yapmaa.

Dört yıldan sora da, cambazlıklan hem kanırıklıkan, Gagauz Respublikasının ilk hem tek prezidenti seçilân Stepan TOPAL hem Gagauz Respublikasının Üüsek Sovetin predsedateli ayrılan Mihail KENDİGELÂN bu Respublikayı Moldova kuvetlerinâ sattılar, kayıl olup enilmiş bir avtonomiyaya.



PATRETTÂ: Gagauziyayı tanımak için Helsinki delegaŭtiyasınan buluşmakta (saadan) Georgiy KALÇU, Mihail KENDİGELÂN, Stepan TOPAL, ÇİMPOEŞ, Dimitriy KROYTOR, Nikolay STOYANOV, Födör TERZİ hem Helsinki delegaŭtiyasının azaları, 1994 y.

1994-cü yılda satkınının meyvası: Avtonomiyayı Moldova kuvetlerinâ tabla üstündâ mi sürdülâr?

1990-cı yılın Harman ayın (avgust) 19-da, Kişinevdan hiç birinâ sormada-an, Gagauz Halkın Üstolan Kongresi

kurdu Gagauz Respublikasını hem 4 yıl onu korudu. Ama 1994-cü yılda Gagauz Respublikasının başında

“Bu toprakların saabileri olan Moldovannarın duŭşmannarının, Gagauziyanın avtonomiyasının yok edilmesini isteeriz. Bizim duŭşmannarımıza Moldova R. bütetından para başka vermeyin”.

bulunan Stepan TOPAL hem Mihail KENDİGELÂN, tükürüp Kongresin Kararlarına, o Respublikayı sattılar da, dilenciya verilân bir ekmek kuru-su gibi, Kişinev kuvetlerinin bizâ bir avtonomiya esabı atılan kuru ekmek kenarını kemirmââ başladılar.

Açan sän kendinâ saabi diilsin da yaşêrsın onunnan, ne sana “saabilâr” atêr, hazır ol, ani herbir kıpımda saabilâr o atılan işleri, bir umursuz, geri almaa saabidir.

Te şindi bu geeri almanın eŭşinââ geldik. O geeri almanın hazırlanması çoktan, taa 1994-cü yıldan beeri gider, ama tetââ basmak 2022-ci yılın Harman ayın (avgust) 19-da Moldova Prezidentin binasının yanında yapıldı. Lafta “bilinmeyân” kişilâr mi, “bilinmeyân” partiylar mı Prezidentin binasının auluna bu plakaty koydular, angısında romınca yazılı: “Bu toprakların saabileri olan Moldovannarın duŭşmannarının, Gagauziyanın avto-

nomiyasının yok edilmesini isteeriz. Bizim duŭşmannarımıza Moldova R. bütetından para başka vermeyin”.

Bu yazıların saabileri, maamilâ surat bilinmâzmiş, sansın Prezidenturanın dolayında hiç bir videokamera yokmuş hem Prezidenturanın bekçileri uyuyarmış gibi. Osa bu işi kendileri mi yaptılar?

Hadi bu onnarın esabına kalsın. Ama Harman ayın (avgust) 19-da Gagauz Respublikasının 32-ci yıldönümünü ölä tantallı kutlayan Gagauziyanın Başkankası hem avtonomiyanın garanti İrina VLAH ne susêr? Neredâ tumba gibi şiş Gagauziyanın Respublikasının “patriotların” sesi? Ne susêrlar!? Osaydı 2022-ci yılın Harman ayın (avgust) 19-da taa bir hayınlık mı oldu da avtonomiyay Moldova kuvetlerinâ tabla üstündâ mi sürdülâr? Bir sürü cuvapsız soruş...

Todur ZANET, Akademik hem poet, Gagauz Milli Gimnanın avtoru



Eşinmeklär ilerleer: “Kaul județina baalayıp, Gagauziyayı yok etmää!” da işi bitirmää!

Eskidän Moldova Parlamentın deputatı, ama büün istoriyanın geçmişindä olan, Moldova Halk Ftontundan hem şimdi “Hristian-demokrat halk partiyası”nda bulunan, Büyük Köseli küüyündä dünneyä gelän unionist Stepan SEKÊRÄNU (Ștefan SECĂREANU) teklif eder Moldovayı Romıniya administrativ sistemasına, județlara, çevirmää da, Gagauziyayı yok edip, onu Taraklı rayonunnan bilä, Kaul județına baalamaa.

Nică sayêr Stepan SEKÊRÄNU (Ștefan SECĂREANU): “Gagauziyayı yok etmää deyni Moldovada hiç referendum da diil lâazım yapmaa – eter ki Maya SANDU (Moldovanın prezidenti) hem onun

“islää insannar” pravitelstvosu bu uurda politika isteyişini göstereceğini” da bunun işi bitirmää. Ona görä, bu iş olarsa, ozaman gagauzlarda kendi kulturalarını ilerletmää taa çok kolaylık olacekmış.



Bunun esabını da yok kim sorsun: Bütündünnä Gagauzların Kongreslerini yok edip, ekonomika forumnarı yapêrlar

Gagauziya Başkankasının altında olan Gagauziya İspolkomu açıkladı, ani sıradaki “Invest Gagauzia” ekonomika forumu bu yıl Canavar ayın (oktâbri) 7-8 günnerindä olaceymış. Ye kaçırılan hem atladlan Bütündünnä gagauzların artık V-si, VI-sı hem VII-si Kongresleri ne zaman olacak?



Başkanka İrina VLAH Gagauziya başını geçtiği gibi (mart 2015), gagauzların köklerini kesmää başladı. Belliki, başlayıp GAGAUZLUKtan. Bu işi de başlattı bütün dünnä gagauzlarını birleştiren “Bütündünnä gagauzların Kongres”lerini yok emektän.

Hepsimiz biliriz, ani çekedip 2006-cı yıldan beeri, her üç yıl aşırı Gagauziyada Bütündünnä gagauzların Kong-

resleri olardı: I-ci Kongres – 2006-cı yılın Orak ayın (iyül) 20-21 günnerindä; II-ci Kongres – 2009-cu yılın Harman ayın (avgust) 18-19 günnerindä; III-cü Kongres da – 2012-ci yılın Kasım ayın (noyabri) 2-3 günnerindä geçti. IV-cü Kongres lâazımdı olsun 2015-ci yılın Kasım günnerindä. Ama olmadı! Başkanka onu ertelemää başladı, ama insannarın baskısı altında bu Kongre-



si zar-zor 2017-ci yılın Hederlez ayın (may) 5-6 günnerindä yaptı da işi bunun bitirdi.

Türlü yalannar uydurup, ba ekonomika, ba saahlık durumu, ba kendisinin keyfi sebebinä, gagauzların V-ci Kongresini yapmaktan kaçtı hem kendisinin cöbinä para getirän ölä denllän “Invest Gagauzia” ekonomika forumnarını bir umursuz yapêr.

Bakın:

V-ci Kongres lâazımdı olsun 2018-ci yılda. **Olmadı!**

VI-ci Kongres lâazımdı olsun 2021-ci yılda. **Olmadı!**

VII-ci Kongresä sıra hiç gelmeyecek ta!

Bunun esabını da yok kim sorsun!

Akademik hem poet Todur ZANET, Gagauz Milli Gimnanın avtoru



“Yabancı memlekettä injener olarak

Türkiyeden studentların ilerdeki zanaatlarında bilgilerini derinnetmää hem ustahklarını kaavileştirmää deyni, Türk İşbirlii hem Koordinatıya Agenstvo-su (TİKA) artık ikincilää Gagauziyada bir paylaşım programası düzenneer – bu kerä gelecektä injener olannar için.



Kişinev TİKA programaların koordinatörlük ofisin zaametinnän, gelecektä injener olacek Türkiyeden gelän 10 student için pek gözäl bir aftalık programa hazırlanmıştı. Başlayıp Kişinev TİKA programaları koordinatörlük ofisinnän hem ofisin çalışmalarınnan tanışmadan, studentlar Türkiye Hava Yolları (THY) ofisinnä gittilər hem Moldovanın baş kasabasını Kişinevu maasuz ekskursiya transportunna gezdilər. Onnara Kişinevde TİKA tarafından yapılan proektları da gösterildi hem kolaylık verildi görmää Türkiye tarafından remont yapılan

Moldova Prezidenturasının binasını hem kilim uzorlarında taşlarlan döşeli Kişinevün yayan gezilän sokaanı.

Gagauziyada programanın zanaatlık uurunda çalışmaları geçtilär Komrat Türkiye tarafından düzülän “Türkiye Prezidentin Recep Tayyip ERDOĞAN üretilicilik kompleksi”nda.

Bu çalışmalardan kaarä, programaya katılannarın oldu kolaylıkları tanışmaa Gagauziyada TİKAnın aslıya çıkarılmış proektlarınnan da: Komrat-taki “Hoca Nastradin” adına modern yatılı uşak başçası, Komrat regional bolnişasının “Aziz SANCAR” adına

alıştırma hem diagnostika korpusu, Komrat Recep Tayyip ERDOĞAN adına ihtärlar Evi hem taa başka.

Gagauziyaylan taa derindän tanışmaa deyni Türkiyeden studentlara ekskursiyalar yapıldı Komrat Devlet Universitetına, Komrat ATATÜRK bibliotekasına, Kongaz “Gagauz sofrası” kompleksına, Çadır kasabasının At fernasına.

Çadır kasabasında studentlar Türkiye 15 Temmuz şehitlerine anmak nişan taşına çiçek koydular.

Komrat-ta studentlar erindeki komandaylan bir futbol matçı oynadılar

hem Ukraynada cenk betirinä Moldovaya ukraynalı kaçaklarına TİKA tarafından yardım paketleri vermä sırasında pay aldılar. Yardım sırasında başta TİKA Kişinev programaların Koordinatörü Selda ÖZDENOĞLU hem TİKA zaametçileri hem da Komrat primarı Sergey ANASTASOVlan primariya zaametçileri da pay aldılar.

Bu sıkışık, meraklı hem verimni programa başardıynan, Kişinev TİKA programaların koordinatörlük ofisinnä hepsi günnerä bir incelemä yapıldı hem “Yabancı memlekettä injener olarak çalışmak” konulu söz oldu.




“çalışmak” TİKA paylaşım programası



Gagauz Respublikasını halizdän kuran insannarın rubaları diil muzeydä – patretlerdä

Gagauz Respublikasının 32-ci yıldönümü kutlamaları sırasında, Komratta Stepan TOPALın evindä, ani gagauzların parasınnan Stepan TOPALın aylesindän satın alındı, genä gagauzların parasınnan Stepan TOPALın muzeyi kuruldu, Stepan TOPALın rubalarının odası açıldı (*yukarda sol patret*). Da “patriotikaya” üüretmää deyni, gagauz uşaklarını o rubalara baş iiltmäk için götüreceklär. Ozaman, bu patretleri dâ, ani büün tiparlêêrız, o zala koysun-nar, da uşaklar görsünnär Gagagauz Respublikasını kuran haliz insannarı o zamannar nicä giimniydi hem ne ayak kabı taşıyardılar.



Avdarma küüyündä moldovan volontörlerine karşı duran insannarın giyimneri (*yukarda solda*), 26.10.1990 y.

Maşına üstündä duran Komrat raykomun 1-ci sekretari Födör MANOLOVun hem komratlıların giyimneri, 28.07.1990 y.

Komrat poyraz blokpostunda duran Gagauz Respublikasını koruyucuların giyimneri (*solda ortada*), 25.10.1990 y.

Valkaneşin dou blokpostun koruyucuların giyimneri (*solda aşıada*), 26.10.1990 y.

Kırın tepesindä tek başına Gagauz Respublikasını koruyan adamın giyimneri (*saada aşıada*), 26.10.1990 y.



Gagauziyayı korumakta Türkiyedän yardım istenilecek. Etştirilärsä!!!

Gagauziyaya yapılan saygısızlıkları, baskılarları hem Moldovanın Gagauziya avtonomiyasını yok etmek eşinmeklerini esaba alarak, neettä var, **ETİŞTİRİLİRSÄ**, bu yılın Canavar ayın (oktäbri) 2-dä Gagauziyanın hepsi uurlarda deputatların Kongresini yapmaa da o kongrestä Gagauziyayı korumak için Türkiye Respublikasından arka yardım istemää.



Gagauziyaya yapılan saygısızlın hem baskıların arasında en ilk sırada bulunêr Moldova Prezidentin Gagauziyaya adanmış vizitlerinden vazgeçmesi hem Moldovanın “Fulger” speñnaz poliñya Birliin Harman ayın (avgust) 18-dä Komrat kasabasının merkezindä

silählü denemelär yapması. Bundan kaarä Gagauziyada sayêrlar, anı, ortalık karışır, Gagauziyaya var niçä Moldova silählü kuvetlerinnän bilä Romıniya silählü kuvetleri da girsın.


Kongresi hazırlayannar açıkladılar, ani bütün Moldovada hepsini yapêrlar, ani Romıniyayla birleşmää, ama gagauzlar Romıniyaya girmäk istämedikleri için, Kongrestä buna karşı yardım Rusiyadan da istenilecek.

Açıklandı, ani şüpä var ki, Rusiya askeri Ukraynanın Odesa bölgesinä girdii gündä, Romıniya da, bu sebeplän, kendi askerlerini Moldovaya sokacak.

Bu üzerä Canavar ayın (oktäbri) 2-dä yapılacak Kongresä buyur edileceklär gelsinnär Türkiye, Rusiya hem OESD temsilcileri, Moldovada bulunan diplomatiya misiyaların başları hem bükelçileri, çünkü Kongrestä danışılacak Türkiyeyä, Rusiyaya hem OESDya, ani onnar Gagauziya (Gagauz Yeri) avtonomiyasını yok edilmektän kurtarsınlar.

Kongazlı bay İliya STAEV 100 yaşını tamamnadı da taa bir 100-lää adımnadı!

2022-ci Harman ayın (avgust) 23-dä kongazlı bay İliya STAEV saa-selem 100 yaşını tamamnadı da taa bir 100-lää adımnadı. Ne mutlu bu adama, ani gözäl yaşadı hem baaşladı bu dünneyä 11 uşak, 36 unuka hem 52 pravnuka.



Bay İliya STAEV bütün yaşamasını Kongazda geçirdi, topraş işledi hem ömüründä hiç bir kerä saallından aalaşmamış hem doktorlara danışmamış. Canabisi, romın vakidında duudu hem büüdü. 1941-1945 yıllardaki dünnä cengini hem 1946-1947 yılın yapılan açlı saa-selem geçirdi. O zor yaşamayı da, islää yaşamayı da gördü hem geçirdi, ama hiç bir kerä o zorluklara gücenmedi – salt isleelikleri gördü hem onnara sevindi. Şindi dâ seviner.

Bay İliya STAEVı bölä gözäl yıldönümünän kutladılar yakınnarı, küüyün primarı, halk deputatı, Gagauziyanın Başkankası hem rayon administraiyanın başı. Saalık hem uzun ömür Sizä, bay İliya!

Türkiye dışışleri bakanı Moldova diplomatlarına danıştı

Harman ayın (avgust) 18-19 günneri arası Moldova dışışleri ministerliindä oldu Moldovanın başka devletlerdä Bükelçilerinnän buluşma, neredä Moldova diplomatlarına bir onlain danışma yaptı Türkiye Respublikasının dışışleri Bakanı Mevlüt ÇAVUŞOĞLU da.

Maasuz musaafir olarak bu toplantıda Moldova diplomatlarına bir onlain danışma yaptı Türkiye Respublikasının dışışleri Bakanı Mevlüt ÇAVUŞOĞLU. Başka sözlerin arasında Mevlüt ÇAVUŞOĞLU teklif etti taa ileri dooru da karşılıklı işbirlii hem dostluu kaavileştirmää.

Moldova dışışleri ministrusu Niku POPESKU (Nicu Popescu), kendi tarafından urguladı, ani “Moldova Res-

publikası hem Türkiye ileri dooru da ikili ilişkileri kaavileştirecek, bu uurda keezi alıp alış-veriş hem ekonomikaylan investiiya aspektlarına... İleri dooru da ekonomika alanında bizim sıkı partnörümüz kalıp, Türkiye, Moldovaya mal yollamakta 4-cü erdä bulunêr”.

Moldovanın başka devletlerdä Bükelçilerinnän buluştu Moldova Respublikasının Prezidenti Maya SANDU da.



Aydar küüyün 128 yıllık el dermenini eniletilär, maasuz “Gagauz kilimneri” Festivalindä işlettilär

Evropa Birliin “Güvenii kaavileştirmä sıraları” Programasının çerçevesindä Gagauziyanın Aydar küüyün 128 yıllık el dermeni enilen-di hem kolaylık verildi bu dermen, türist obyektı olarak, insannara iz-met etsin.

Enilenän el dermeni yapıldı 1894-cü yılda Aydar küüyün yanında bulunan çayırdı da 128 yıl artık ayakta kaldı. Bitki yıllarda o pek veran oldı, ama Allahın hem insannarın yardımınan korundu hem temelindä kaldı.

Aydar küüyün hem Gagauziya kuvetlerin zaametinnän el dermenin kurturulması hem enilenmesi alındı Evropa Birliin “Güvenii kaavileştirmä sıraları” Programasına hem bu iş için oradan 800 bin leydän zeedä para ayırıldı. Aydarın bu yılki kurbanına karşı bu 128 yıllık el dermeni XXI-ci üzyılda ilk pak ununu üüttü taman Aydar küüyün “Gagauz kilimneri” Festivalinä, ani bu yıl Harman ayın (avgust) 14-dä yapıldı.

Sadecä “Gagauz kilimneri” olarak başlayan bu erindeki Festival gittikçä yayılmaa çeketti da artık respublika uurunnda bir sıraya dönüser, çünkü bu yıl onda pay aldılar insannar Moldova-



nın Basarabka, Çimişli, Hınçeşti hem Taraklı rayonnarından da.

Festivalda insannarın önündä evel-

ki hem şindiki kilimnär sergilendi, o kilimnerin en isleeleri ayırıldı, kilimnerin hem palaların dokunmak teh-

nologiyaları gösterildi, el ustaların malları satıldı hem da, belliki, gagauz imekleri dadıldı.



Evelki zanaatları hem ustalıkları paylaşmak

Harman ayın (avgust) 17-dä Gagauziyanın Çadır rayonun uşakları için “Kırlangaç” dinlenmek lagerindä Gagauziya ustalar Birliin ustası Evdokiya Petrovna PETKOVIÇ tarafından yapaa keçesi yapmak uurunnda master-klas gösterildi.

Yapaa keçesi yada, nicä ona taa deerlär, aba yapmak ustalığı bizim tarafımızda artık pek siirek, may hiç olmayan bir ustalık. Bu zanaatı hem ustalığı da pek islää bilers hem kullanêr Gagauziya ustalar Birliin azası hem da Caltay gimnaziyanın işta hem ustalıkta pedagogu Evdokiya Petrovna PETKOVIÇ.

Harman ayın (avgust) 17-si günündä Canabisi “Kırlangaç” dinlenmek lagerindä kendi ustalığınan uşakları ile paylaştı. Uşaklar da kendilerinin tarafından keçä yapmaa ustalık teknikasına büyük meraklıklar gösterdiler.

Ayrıca uşakları taa bir sürpriz beklardı: Caltay gimnaziyanın 6-cı klasta üürenciykaları Elena ÇERNEVA hem Darya LAZAREVA çaldılar uşaklara Gagauziya ustacılık Gimnası olan türküyü “Yaşasın dünnedä gözellik”, angısının muzıkasını hem laflarını düzmüş Evdokiya Petrovna PETKOVIÇ.

Bütün ürektän şükür ederiz Evdokiya Petrovna PETKOVIÇä gagauzların evelki zannatını diriltmesi hem koruması için hem da onunnan bizimnän paylaştı için.

“Kırlangaç” dinlenmek lagerin administratıyası



“ANA SÖZÜ” Gagauz dilindä gazeta
Çıkêr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basılêr
Tiraj – 3020 ekz. Sımarlamak No: 902

YAZIŞMA ADRESİMİZ:
RM – 2028, Moldova, Kişinêu,
c/p Nr. 1025. Tel/fax: 022 28-18-04
e-mail: todur.zanet@gmail.com
zanet@anasozu.com